



**P R A V I L N I K**  
**o službenoj legitimaciji državnih službenika u Službi za reviziju finansiranja**  
**političkih stranaka**

Sarajevo, maj 2024. godine

Na osnovu člana 10. stav (1) Zakona o finansiranju političkih stranaka ("Službeni glasnik BiH", br. 95/12 i 41/16) i člana 18. Poslovnika Centralne izborne komisije Bosne i Hercegovine ("Službeni glasnik BiH", br. 32/23, Prečišćeni tekst), Centralna izborna komisija Bosne i Hercegovine je na 20. sjednici održanoj dana 03.05.2024. godine donijela

**P R A V I L N I K**  
**o službenoj legitimaciji državnih službenika u**  
**Službi za reviziju finansiranja političkih stranaka**

**Član 1.**  
**(Primjena)**

Pravilnikom o službenoj legitimaciji državnih službenika u Službi za reviziju finansiranja političkih stranaka (u daljnjem tekstu: Pravilnik) utvrđuje se pravo na službenu legitimaciju, sadržaj i izgled službene legitimacije, način korištenja i izrada službene legitimacije državnih službenika u Službi za reviziju finansiranja političkih stranaka (u daljnjem tekstu: Služba za reviziju).

**Član 2.**  
**(Pravo na službenu legitimaciju)**

Pravo na službenu legitimaciju u Službi za reviziju imaju državni službenici:

- a) šef Službe za reviziju,
- b) revizori i
- c) pomoćnici revizora.

**Član 3.**  
**(Sadržaj legitimacije)**

(1) Identitet državnih službenika iz člana 2. ovog Pravilnika, utvrđuje se na osnovu službene legitimacije.

(2) Službena legitimacija je bijele boje, plastificirana, dimenzija 80 mm x 60 mm. Na prednjoj strani službene legitimacije, crnom bojom, desno od grba Bosne i Hercegovine, ispisan je tekst: "BOSNA I HERCEGOVINA", ćiriličnim pismom, a lijevo latiničnim pismom, ispod toga tekst: "CENTRALNA IZBORNA KOMISIJA", desno od grba Bosne i Hercegovine, na srpskom jeziku, a lijevo od grba Bosne i Hercegovine, na bosanskom i hrvatskom jeziku, ispod toga tekst: "Službena legitimacija", a ispod toga tekst:

"Ime i prezime \_\_\_\_\_ JMB \_\_\_\_\_ zvanje/status \_\_\_\_\_, mjesto za fotografiju dimenzije 25mmx30mm, broj službene legitimacije, mjesto i datum izdavanja, pečat Centralne izborne komisije Bosne i Hercegovine i potpis predsjednika Centralne izborne komisije Bosne i Hercegovine."

(3) Na poleđini službene legitimacije ispisan je tekst: "Nosilac ove iskaznice ovlašten je u okviru svojih nadležnosti utvrđenih Zakonom o finansiranju političkih stranaka da nesmetano pristupa

poslovnim prostorijama političkih stranaka ili objektima koje iste koriste prilikom svog djelovanja i da ostvaruje uvid u poslovnu dokumentaciju, evidencije i sl.”.

#### **Član 4. (Korištenje legitimacije)**

(1) Osobe koje imaju pravo na službenu legitimaciju dužne su da legitimaciju koriste u skladu sa dužnošću i ovlaštenjima utvrđenim Zakonom o finansiranju političkih stranaka i općim aktima Centralne izborne komisije Bosne i Hercegovine.

(2) Korisnik legitimacije dužan je nositi legitimaciju za vrijeme vršenja službene dužnosti i pokazati je prilikom obavljanja službene dužnosti.

(3) Zaposlenik u Službi za reviziju, kao identifikacionu legitimaciju, koristit će akreditaciju Sekretarijata Centralne izborne komisije Bosne i Hercegovine.

#### **Član 5. (Povreda dužnosti)**

Korištenje službene legitimacije suprotno odredbi člana 4. stav (1) ovog Pravilnika, od strane državnih službenika iz člana 2. ovog Pravilnika, predstavlja težu povredu radne obaveze.

#### **Član 6. (Zamjena legitimacije)**

(1) U slučaju gubitka ili znatnijeg oštećenja službene legitimacije, državni službenik iz člana 2. ovog Pravilnika, dužan je u roku od tri dana sačiniti detaljan pisani izvještaj o okolnostima pod kojim se to dogodilo, radi izdavanja nove legitimacije.

(2) Nova legitimacija će se izdati i ukoliko su nastupile promjene ličnog identiteta državnog službenika iz člana 2. ovog Pravilnika, bitne sa aspekta mogućnosti njegove identifikacije.

#### **Član 7. (Povrat legitimacije)**

Državni službenik iz člana 2. ovog Pravilnika, koji po bilo kojem osnovu izgubi status državnog službenika u Službi za reviziju, dužan je odmah, a najkasnije u roku od sedam dana od dana gubitka tog statusa, vratiti legitimaciju.

#### **Član 8. (Evidencija)**

(1) O izdatim i zamjenjenim službenim legitimacijama vodi se evidencija u elektronskom obliku.

(2) Evidencija iz stava (1) ovog člana, vodi se u Službi za reviziju i sadrži:

Red. br.	Ime	Prezime	Zvanje/Status	Broj legitimacije	Datum izdavanja	Datum vraćanja	Primjedba
----------	-----	---------	---------------	-------------------	-----------------	----------------	-----------

**Član 9.**  
**(Izrada službenih legitimacija)**

Izrada službenih legitimacija izvršit će se najkasnije u roku od osam dana od dana stupanja na snagu ovog Pravilnika.

**Član 10.**  
**(Upotreba izraza u muškom i ženskom rodu)**

Riječi koje su radi preglednosti u ovom Pravilniku, navedene u jednom rodu, bez diskriminacije se odnose i na muški i na ženski rod.

**Član 11.**  
**(Prestanak primjene)**

Stupanjem na snagu ovog Pravilnika, prestaje važiti Pravilnik o službenoj legitimaciji državnih službenika u Službi za reviziju finansiranja političkih stranaka ("Službeni glasnik BiH", broj 70/11, Prečišćeni tekst).

**Član 12.**  
**(Stupanje na snagu i objava)**

Ovaj Pravilnik stupa na snagu osmog dana od dana objavljivanja u "Službenom glasniku BiH" a bit će objavljen i u "Službenim novinama FBiH", "Službenom glasniku RS", "Službenim novinama Brčko distrikta BiH".

Broj: 05-1-02-2-586-1/24  
Sarajevo, 03.05. 2024. godine

